

西山史論

楚狂

西山一代雖享國不久。然一時事業赫赫在人耳目。爲我歷史上最有價值的時代。彼世之史學家往往爲一姓一家偏袒顛倒是非。斥之爲僞。稱之爲閭。當時盛事概隱而不書。使一時代之事實。抑而不伸。晦而不章。識者病之。已非一日矣。夫正僞之說。爲古來史學家叢訟之端。至朱熹。法春秋作綱目。其界限益嚴。論史者遂奉爲圭臬。然攷統系。續之交。疆域分拆之世。事變至多。欲彊舉正統以歸之。誰某終難執一義。以自圓其說。善乎司馬溫公有曰。『若以自上相授受者爲正耶。則陳氏何所受。拓拔氏何所受。若以居中夏者爲正耶。則劉石慕容苻姚赫連所得之土。皆五帝三王之舊都也。若以有道德者爲正耶。則蕞爾之國必有令主。三代之季豈無僻王。正僞之辨。無確然不可移易之義。』可謂通論矣。噫。天下勢而已矣。成則呼之爲帝。敗則呼之爲賊。成則雖千奸萬惡。亦且尊之爲聖。爲天。敗則雖豪傑聖賢。亦且罵之爲逆。爲僞。彼爲一姓之臣僕者。徇其所私。議論失當。固亦不足深怪。至於歷史家。須以歷史的眼光而論斷。無所謂正。無所謂僞。只就事實上直書。始足傳爲信史。今乃反是。豈非可慨事乎。西山時代距今不過百年耳。而問諸學者。以當時史故。且茫然莫知所答。正僞之說之爲禍。至烈。一至於此。余因有慨乎此。欲爲古人鳴不平。將歷史上一切不經之語。翻而正之。以示史學之正鵠。因著西山史論。

西山最初發迹者爲中央皇帝。中央皇帝者。卽我輩從來所習稱爲僞岳也。其先父安興元人。號盛德。年間移居歸仁府。今平定後仁府西山邑。父名阮福。生三男。長岳。次呂。次惠。惠卽太祖武皇帝。而我所習稱爲僞惠也。岳初爲雲屯巡卡吏。見順廣一帶地方。爲張福營所專據。膽敢妄爲衆情憤懣。欲乘

時舉事。因捲取公款入山據險。號召黨夥至數千人。自稱爲第一寨主。其黨阮椿爲第二寨主。玄溪爲第三寨主。分據西山上道。玄溪家擁巨貲。常散財助岳。招亡納叛。威振村邑。地方不能制。募生致者有賞。一日岳坐檻車。令其黨送納歸仁。巡撫阮克宣開門納之。其黨潛伏城外。是夜岳破檻而出。奪兵器。殺獄吏。遂開城門。其黨一齊殺入。克宣棄城走。岳遂據有歸仁。建西山旗號。黨與日衆。因分置前後左右屯。時黎景興癸卯三十四年事也。阮主屢命官軍進剿。皆爲所敗。勢益猖獗。會安庸清商集亭。李才等皆應之。集亭稱忠義軍。李才稱和義軍。戰則醉飲裸身。懸金銀紙縑衝陣。示以必死。人莫敢擗其鋒。是冬阮軍節制阮福香引兵至歸仁碧鷄山。爲李才兵所殲。岳又進據思義及延慶。平康。平順諸府。思義以南至平順。皆爲岳有。景興甲午夏龍湖營今永隆。留守宋福治阮科監督領五營將士進取延慶。平順。平康軍次煙崗。相拒。岳反攻廣南。進逼海雲關。會鄭主森遣將黃五福等乘釁取順化。是冬阮主奔回俱低。南屬廣立從子暘爲世子。號東宮。乙未春阮主往嘉定。留暘屯俱低。岳遣人迎回會安庸。欲挾以令軍衆。五福旣克順化。兵踰海雲山。岳迎擊于錦沙集亭。軍先潰。岳與寮安泰二地名以避之。使其屬詣五福乞降。五福以岳爲西山長校壯節將軍。旣而岳又迎暘還。抗江兵薄淋漢。使人告岳曰。還我東宮不然大兵且至無去路矣。岳懼。盡將寶貨藏于西山上。遷暘于河。

李才走板津。共謀誅集亭。集亭懼。奔回廣東。岳遂迎暘還歸仁。夏福治復進到富安。步兵屯春臺水。以女壽香妻之。屢請暘正王位。暘不肯。岳乃出其從臣阮福靖。阮福陞等于外。使人佯就福治乞降。

福治信之。不爲備。岳兵掩至。襲破之。福治退兵煙崗。岳留李才守富安。才尋詣福治軍降。時鄭將五福進次思義珠塢。攜病引兵歸。阮福鬱等起兵攻廣南。岳大破之。留其將阮文睿等守升奠。景興甲申三十八年。岳盡籍歸仁府符離。綏遠蓬山三縣民爲兵。遣弟呂以水師政嘉定。阮主走邊和。

呂據柴棍會東山道杜清仁起兵進攻柴棍。呂敗奔歸仁。岳乃增廣闔槦城。自稱天王。鑄金印。遷暘爲太上皇。丁酉岳遣其臣杜富雋使于鄭。求廣南閫節。鄭森亦厭兵。乃授岳爲廣南鎮守。宣慰大使。封恭國公。先是景興乙未岳上其弟惠功於鄭將黃五福。五福以惠爲西山校前鋒將軍。及岳稱帝。拜惠爲龍驤將軍。至是令惠呂分水步軍進攻嘉定。惠聲如巨鐘。目閃若電光。狡黠善戰。鬪人皆憚之。惠臨陣必身先士卒。號令嚴明。部曲皆屬心焉。李才拒之。兵敗。暘退保柴津。暘今定祥復下巴越。永隆爲惠兵追逼。遂遇害。阮主奔龍川。岳將掌奇誠攻龍川。阮主及阮福嗣同殉難。惠及呂回歸仁。留總督朱虎將罕司寇威護駕范彥以水師攻鎮邊。順平沿海諸地方。阮世祖自將擊之。奔還。景興戊戌岳自立爲帝。紀元泰德。以是年爲泰德元年。名闔槦城爲皇帝城。以弟呂爲節制弟。惠爲龍驤將軍。復遣總督朱司寇威護駕范彥以水師攻鎮邊。順平沿海諸地方。阮世祖自將擊之。杜清仁獲司寇威于牛渚殺之。總兵阮文弘進次鹿野。殺岳將廉陵等。范彥敗走。世祖攻下平順。進逼延慶府。景興庚子阮世祖卽王位于柴棍。壬寅杜清仁有罪伏誅。岳聞之喜曰。右芳清仁別名既死。餘不足慮也。遂與弟惠率戰船數百艘入芹蔭海口。戰于七岐江。世祖軍潰退保三埠。於是柴棍復爲岳所有。夏四月阮將節制阮福裕以李才軍和義道兵入援殺范彥於參良橋。岳聞之如失左右。以和義道兵皆清人。遂盡捕清人之在嘉定者萬餘人。不問兵民商賈皆戮之。投屍滿江。世祖奔呂埠。岳將都督學躡其後。爲阮將阮金品所襲。衆皆潰走。惠兵掩至。背水爲陣。世祖師敗奔富國。島岳引兵回。留東山降將杜閒蟄戶部伯守嘉定。秋八月阮將朱文接自富安入援。蟄等敗走。世祖回嘉定。景興癸卯惠呂復進攻芹蔭。泝流而上。文接兵潰。世祖奔三埠。阮黃德殿後惠麾兵鏖戰。虜

黃德及其屬五百人。世祖奔岷崐島。岳駙馬張文多率水師奄至圍之。數重勢甚急。會晝起大風雨。下如注。西山船多被蕩覆。風送世祖舟出海外。由是世祖復得回富國島。惠乃北還。使多守嘉定。景興甲辰。世祖如暹求援。暹主遣其姪昭曾昭霜率水師二萬、戰船三百艘出北滄海口直抵巴忒。茶溫斌切沙的等處。所至皆披靡。多奔龍湖。遣人告急于惠。惠復引兵至。數戰不利。欲引還。有阮將黎春覺教惠以勁卒伏于浮江吹蔑江。瑞定而誘暹兵來。昭曾等狃於累勝。又不知險易。直下美萩。惠伏兵卒起。水陸奄擊。暹兵大敗。僅存殘卒數千。由上路回。景興乙巳。世祖復如暹。留都附鄧文真等守嘉定而回。丙午。惠欲取富春。岳初止之。及聞阮有整之言。以爲然。命惠率節制水步諸軍。以整爲右軍都督。其壘武文任爲左軍都督。呂率水師繼發。五月。惠達克富春。使呂守之。而自率水師直取北河。飛書回報。岳不悅。使人止之。至則惠已行矣。及聞惠克昇龍。乃率親兵直抵昇龍。旬日。又挈惠南還。以惠爲北平王。鎮順化。呂爲東定王。鎮嘉定。而自稱中央皇帝。

北伐之役。鄭府貨寶一歸于惠。岳索之。惠不肯與。惠欲併廣南之地。岳亦不與。兄弟遂成仇隙。治兵相攻。惠自恃勢力大。引兵直擣歸仁園之數月。岳堅壁自守。惠築土山駕大礮。彈落城中大如斗。岳使人拾之。哭告于廟。岳將鄧文真自嘉定入援。纔至富安。爲惠所獲。岳乃於城上呼惠語之曰。皮錫貢肉。弟心何忍。相向慟哭久之。乃各解兵講和。以板津爲界。思義以南岳主之。升奠以北惠主之。聽其臣陳文紀之計也。

岳既與惠有隙。自是人各有心。不暇南顧。是年世祖遣百多祿護皇子景如西請援。丁未。昭統元年。世祖自暹返旆。進抵芹藤海口。呂退守諒埠。翼邊令太保范文參守柴棍。世祖命軍攻之不下。乃假作密

書言參驕橫使呂設計殺之而詭投參所參大驚世祖卽詐起白旗率兵下諒埠呂疑參已降遂奔歸仁尋死參後力屈投降復謀叛爲世祖所殺戊申惠聞孫士毅率師入援乃卽皇帝位於富春紀元光中舉兵而北士毅大敗渡河北還黎帝亦與士毅偕北入依內地惠遣將追擊至諒山關內地震動己酉清帝卽降旨以閣臣福康安代毅爲兩廣總督提督九省兵馬五十萬刻日赴南關經理安南事

初清帝遣毅出師尋有密諭緩行無急傳檄爲之先聲又放黎故臣回國尋黎帝出來與阮惠對敵若惠退避卽使黎帝追蹤而以大兵繼之則不勞而成功此策之上也如通國之人左右袒各半而惠若不退師則須俟閩廣水師放洋先攻順廣卽以步兵前進令惠腹背受敵勢必歸服因而兩存之順廣以南割以與惠驅愛以北復以封黎因頓大兵于其國以遙制之俟後別有處置及毅狼狽北走所帶勅書遺棄於道惠得之語吳時任曰我看清帝勅書不過視強弱爲左右存黎之舉非出于本心特假此爲名而實圖自利而已今一敗之後必以爲恥想他斷不肯休但兩國交爭亦非生民之福今唯有善於詞令方能弭得兵端此事卿須主之乃命凡所俘獲清人各給與口糧擇地安頓適江左兵備湯鴻業移書略言黎維祁棄國而逃清朝斷不復以安南界之可趁此未奉諭旨之前委人叩關籲請庶可仰邀恩典惠得書知清欲講和乃上表言臣本西山布衣乘時舉事丙午興師滅鄭還國于黎王前黎王謝世又擁立嗣君維祁襲位祁爲人淫暴國內之臣若民奔憇於臣不謀同辭請爲出兵除亂丁未臣遣一小將以兵問其左右之助桀者而維祁望風宵遁自貽伊戚戊申臣進至黎城復委前黎王之子維禮監國經遣行介過關備以國情籲奏而維祁之母先赴斗隘委身乞援孫士毅以封疆大臣却以財色之故將臣之表章裂擲於地凌辱行介意欲動衆興戎不

知此事果出大皇帝差遣。抑或士毅爲一婦人所使。邀邊功以求大利也。夫以海濱一帶人士甲兵。不足以當中國之萬一。而深澗在前。猛虎在後。衆情怕死。咸思奮勵。臣不避投鼠之謗。以三五邑丁相從。今年正月初五日進至黎城。冀與士毅一見。或得以玉帛代干戈。轉兵戈爲衣裳之會。乃士毅之兵先來迎戰。纔交鋒奔潰四散。其走躲城外村庄。又爲環城所殲殺。臣入城之日。立即禁止。不得妄殺。一切護送入城。該八百餘口。臣已給之廩食。竊念本國自丁黎李陳以來。世代遷革。不是一姓。有能爲南郊藩翰者。裁而培之。惟至公至仁而已。伏惟體天行化。順其自然。恕臣迎敵士毅之罪。諒臣數番款闢陳奏之誠。錫臣爲安南國王。俾有統攝。臣當遣使詣闕奉藩修貢。併將現存人口回納。以表至誠。夫以堂堂天朝。較勝遜於遠夷。決聖心之所不忍。萬一兵連不止。勢到那裏。誠非臣之所願。而亦不敢知也。」湯鴻業接見大驚。語來使。嘻虎侯曰。此非兩軍交戰之日。何乃一味以怒氣行事。如此立言。欲邀封爵乎。抑欲激起兵端乎。匿其表不肯達。時惠已定北河。心懷內顧。留吳文楚等守昇龍。語之曰。凡中朝詞令專委吳時任。與潘輝益往復均聽便宜處置。無關繫不必稟報爲也。乃引衆南還。已而福康安抵粵。西專意講和。移書以利害喻之。惠亦以金帛厚遺康安。求爲玉成。遂改名光平。遣其姪阮光顯並陪臣武輝瑨齎貢品叩關懇請入觀。表文略曰。臣起西山布衣。先有廣南之地。與黎氏本無上下之分。上年曾遣人叩關備陳。與黎氏構隙緣由。邊臣駁書不卽遞達。及官兵出關助勦。臣於今年正月日前至黎城。欲向黎維祁詢問籲請天兵之故。不料官兵一見奮勇殺戮。臣手下等猝難束手就縛。又值江橋折斷。官兵有至損傷。不勝惶恐。已屢次遣人叩關請罪。並遞回見留官兵。其戕害提鎮之人。業已目睹正法。本應躬詣覲庭。陳情請罪。因國內初罹兵革。人情

未安謹遣親姪阮光顯隨表入覲。表文皆福康安導意也。清帝覽表準光顯進京諭之曰。爾光平雖自愧懼其抗拒官兵傷及提領之咎。究難解免。若非詣闕請罪。遽邀封號。天朝無此體制。爾既未列藩服。所有貢物未應收納。如必欲輸誠納款。開年值朕八旬萬壽。親自赴京籲懇。其提領等陣亡。當于安南地方建立祠宇。如此朕必格外加恩。或封以王爵。世世子孫可以長留安南。至如黎維祁柔懦無能。棄印逃竄。不忍加之誅戮。僅令在桂林省城安插。斷無乘爾入覲。復將送回安南。令其主國之理。爾可無疑慮也。茲特賜珍珠手串一掛。當祇承恩命。以永承渥眷勉之。惠乃上表謝恩。請以開年入覲。清帝信之。卽封爲安南國王。命廣西候補成林前往。旣抵關惠托言昇龍旺氣消歇。邀請往富春成林。以非例不肯往。惠遂托病奉延。始以甥范公治詐冒行之。尋遣齋方物謝恩。且言家有老母。要請人參壽品。清帝發尙方東參一斤。馳驛賜之。惠謝表云。臣有母有親。報答仰憑於大造。君爲師爲父。生成深冀於隆霑。其謝求封表云。倉皇必死之年。容身無地。倉卒求生之日。獲罪于天。清帝批曰。此語可嘉。朕不忍以子視女也。庚戊光中三年春。康安促惠入覲。復托言母死。請以子光垂代已入覲。康安不可。密使人往關上委曲誘掖。如不得已。須以狀貌類已者代之。惠乃以范公治冒己名。使其臣吳文楚、鄧文貞、潘輝瑨、武名標、阮進祿、杜文功階例外貢雄象二匹。兩廣總督福康安、廣西巡撫孫永清伴送抵京。到熱河行宮入覲。行抱膝禮。御筆賜「拱極歸誠」四字。並對一句云。一祝祿効尊親。永矢丹忱知弗替。觀光膺寵錫。載稽青史。未前聞。御詩一章。瀛藩入祝。值時巡初見。渾如舊識。親伊古未聞來。象闕勝朝往事。鄙金人九經柔遠。祇重譯嘉會。於今勉體仁武。偃文修順。天道大清祚永。萬千春賞賜衣服器皿與親王同。加賞銀一萬兩。及陞辭回國宣。

近御榻旁慰諭溫存。令畫工圖其形賜之。及歸馳賜福字。及尙方珍玩。使者給役於道。清人多疑其假。而清帝信之而不之知也。惟皇十一子心惡之。先是。繫皇如清。其弟維祉占據宣光保樂地。方。祇依土酋儂福。瑨。黃文桐連結萬象鎮寧鄭皋歸合。暹羅諸蠻謀破乂安城。惠命乂安督鎮阮光耀爲大總管都督。黎文忠爲大司隸。悉發乂安兵征之。六月克鎮寧。擒其渠。召難。八月滅鄭皋歸合。十月萬象國長棄城走。獲象馬鈺鼓。長驅至暹羅界。斬其帥左藩容右藩超。暹兵敗走。遂還師保樂。維祉與福。瑨。文桐勢力不支。俱遇害。惠遣其臣武永成陳玉視如清獻捷。名爲恭順。實則誇示也。復請于高平之平水。關諒山之油村。隘開市通商。抽免商稅于南寧府。設立牙行。清帝皆許之。初興化嵩陵。醴泉黃岩。綏阜合肥。謙州六州。宣光牛羊蝴蝶三峒。黎未爲清土司侵占。累世申辦不能得。至是惠移書兩廣總督。請申明故疆。廣督以疆界已定。却其書。惠由是稍不平。勵士卒造船艘。陰有窺覦兩廣之意。嘗語將校曰。假我數年。畜威養銳。吾何畏彼哉。惠既得志。偃然以帝制自居。立黎公主爲北宮皇后。嫡子光垂爲太子。以乂安在國之中。祖貫在焉。乃於麟山下築土城。起樓殿。號曰中都。改昇龍曰北城。分山南爲上下二鎮。上鎮治渭濱。下鎮治珠球。鎮設鎮守協鎮。縣設文分知武。分率二員。更官名。命各攢造丁田簿籍。丁分三等。田有三等。又以瀘江以北戶口多隱占。不以實催。集簿民人各給一牌。號曰信牌。牌著姓名貫址。押手指爲記。內印刻「天下大信」四大字。從吳時任之計也。無牌者爲漏民。給充房役而罪其鄉長。吏役因緣爲奸。四出搜捕。小民至有藏穴以避。不勝其苦。時兩廣烏艚海匪。爲清人驅逐。勢迫投降。收其頭目。授以總兵職。又納四川烏賊號天地會者。乘間出沒海道。爲之不清。清閫臣亦畏其強。不之討也。惠由是有渺視中國之意。壬子光中五年。令修表如清。請婚。以探

清帝意亦欲借此爲兵端。會疾不果往。召又安鎮守阮光耀回商議遷都。乂安議未定。而惠病轉劇。召耀等囑曰。我開疆拓土。奄有南服。今疾必不起。太子資質稍高。然年尙幼。外有嘉定國讐。按世祖先退。以圖靖內難。還兵敗。又遣皇太子景與西監牧。是求援於百多祿。求援於法。至是得法廷之援兵。聲勢稍振。德泰兄王年老。逸樂苟安。不圖後患。我死之後。須於一月內營葬。潦草襄事而已。汝等宜夾輔太子。早遷中都。以控制天下。不然嘉定兵來。汝等無葬地矣。耀等同泣受命。刑白馬盟誓。九月二十九日。惠崩于中和殿。岳聞惠死。率僚屬三百餘人。與其妹往弔。至思義界首。守屯者阻之。岳復回歸仁。惠在位五年。纔四十。葬于香江之南。謚太祖武皇帝。

太子光纘卽位。遣侍中大學士吳時任戶部左同議阮曰。直戶部侍郎阮文宗如清告哀。詭言遺囑。葬于北城之西湖。庶得近依天闕。清帝信之。賜謚忠純。御制誄詩一章。加賜大哈達。佛像也。一大件銀三千兩。俾作喪事。派廣西按察成林賚往苓塘。屬清池縣惠之假墓處。諭祭。祭文有曰。祝釐南極。効忠特獎。其趨朝妥魄西湖。沒世無忘於戀闕。誄章刻石。豎于墓左。光纘初名札。母范氏。歸仁府人。年三十。冊爲皇后。生三男二女。纘乃嫡子也。初假王范公治入觀。清帝勅封光垂爲安南國王世子。後知垂次出。乃改封纘爲世子。加賜玉如意。錦荷花袍。至是惠死。纘卽位。以明年爲景盛元年。時年方十歲。吳時任等如清請命。任等未出關。清帝先得廣西巡撫奏報。卽降旨封爲安南國王。派廣西按察如北城宣封。纘亦假他人受之。清人亦心知其詐也。

纘既襲封。以弟光垂爲康公。節制北邊水步諸營。兼總兵民庶務。光盤爲宣公。領清華督鎮。總理軍民庶務。舅裴得宣。裴得宣與裴文曰均。與范皇后同母異父。爲太師。督視內外諸機務。下山功臣太尉范公興。同掌軍國重事。中書奉政陳文紀。行中書機密諳務。文書令示盡委之。少保阮光耀。下山戰將大都督阮文慎。鎮乂。

安大司寇武文勇。大司會阮文用少保阮文名。大司馬吳文楚形部尙書黎春材鎮北城罷信牌令停汎捕漏民。續年幼從事遊戲。凡事皆決於裴得宣。宣恣行威福。中外皆怨之矣。丑世祖兵圍逼歸仁城。岳遣子寶拒之。軍敗潰走時。岳已得病。馳書富春告急。續遣太尉范公興護駕阮文訓。大司隸黎文忠。大司馬吳文楚等率步兵萬七千人。象十八匹。大統領鄧文翼率舟師三十餘艘。分五道入援。世祖解兵還。興等入歸仁城。岳以金銀盤各一犒師。興乃籍府庫收甲兵而據其城。岳憤恚。嚼血死。續封岳子寶爲孝公。割符離一縣爲食邑。號曰小朝。寶母毀。寶曰。開拓土宇。皆汝父功也。今但食一縣。與其受辱無寧死乎。公興等以病回富春。侍中參議裴得宣得宣子。與阮文訓。黎文忠相繼留守。名爲輔寶。其實陰制之也。

甲寅景盛二年。續護駕阮文訓點檢陳曰。結襲延慶。兵敗引回。復遣總管彌光耀。內候阮文賜。率兵復圍之。相持者累月。是年冬。得宣使吳文楚復代武文勇。調撥北城軍務。而召勇回至漢川驛。時奉政陳文紀有罪。配驛所。密語勇曰。太師位極人臣。擅作威福。將不利於社稷。若不早圖。後悔何及。勇乃密與范公興。阮文訓謀。聲言往南野祭旗乘間。率黨圍得宣于禪林寺。時宣以寺爲居處。是夜宣偶以事宿纘府中。勇環府索之。續不得已。執宣送勇下之獄。吳文楚宣黨也。勇矯詔令節制阮光垂械送來京。又使阮文訓以兵圍歸仁。捕宣子得宣。解回織成反狀。皆溺殺之。續不能制。光耀方圍延慶。得報大驚。語其下曰。主德不剛。大臣相殺。變之大也。內變不定。何以禦人。即日解圍還。勇以耀與得宣有姻。安舊屯于江之南岸。勇與內侯賜軍于江岸之北。挾君命以拒。續憂懼。乃使人往來慰問。和解之。耀

耀妻宣女姓也

始率左右入見。與勇等講解。請以文忠代訓守歸仁。而召訓還。於是光纘親政。五日一朝。是年太尉范公興以病死。乃以耀爲少傅。訓爲少保。勇爲大司徒。阮文賜爲大司馬。名曰四柱大臣。人或譖耀威權太重。將有異圖。續惑之。收耀兵權。但以本職奉侍。耀心懷疑懼。常稱病不朝。率其手下數百人日夜持兵自衛。纘屢使中尉慰諭之。

丁巳景盛五年。世祖親董舟師入施耐海口。攻之不下。遂進薄廣南之沱瀼汎。俱低海雲。舊遣文訓悉師以拒。起復光耀使按施耐海口。世祖見寶爲纘所削奪。又爲忠所脅制。甚懷不平。令人密諭寶曰。今我兵進取廣南。次取歸仁。爾欲雪爾父仇。宜招集舊兵。俟我師臨城下。殺黎忠以迎王師。帶罪立功。在此一舉。無以父罪及子。見疑我斷不殺降也。爾其圖之。秋。世祖引兵還嘉定。寶自得密諭。陰有歸順之志。戊午景盛六年。忠聞少傅與諸將不睦。乃自引部曲回富春。留淵清侯輔寶。寶遂囚淵清侯而據其城。使都督段文葛、阮文紹據富春屯上表乞降于世祖。且言昔者微子投周。張良歸漢。誠以天命有在也。乞大兵速來。願爲前驅。世祖納之。命阮文誠接應。誠師未至。纘已發兵圍其城。擒寶歸。斂殺之。令大總管黎文清守歸仁。太府黎文應言於纘曰。小朝之變。黎忠釀成之也。纘召忠至。命壯士縛殺之。又信尙書胡公曜誣譖。殺少保阮文訓。自此將佐離心。自懷疑懼。大都督黎質姓黎忠。累立戰功。恐禍及已。投歸于世祖。己未景盛七年。世祖兵復進攻歸仁。黎文清閉城死守。光耀文勇絕。遂與尙書張文樸、少尉張進翠以城降。世祖既克歸仁。遂改其城曰「平定城」。留掌後軍武性禮。

部吳從周鎮守。纘聞歸仁失守。大舉兵來至茶曲。促諸將出師。陳曰。結曰。風色不便。請姑還師。乃留耀勇守廣南。阮文甲守茶曲而還。

先是石津之役。勇兵不戰自潰。勇懼。求耀隱其事。自是一人深自結。約爲死友。陳曰。結。胡公耀。陳文紀等素惡耀。以歸仁失守。耀頓兵無功爲辭。矯詔令勇執耀殺之。勇得書示耀。耀大驚。乃引兵回富春。列柵香江南岸。聲言誅君側之賊。纘遣人召之。耀等皆不受命。紀歸罪結。曜結逃。纘執曜送之。耀始解兵入覲。纘諭以卿等爲國柱石。當爲國家同心協力。以除外患。不必懷疑。耀等泣謝。復請將兵入取歸仁。許之。庚申景盛八年。耀步兵薄城數挑戰。阮將武性堅壁自守。耀於城外四面環築長壘圍之。勇以定國大號船二艘戰船百餘艘。橫截施耐海口。又於海口之右三座山左雁洲設兩堡。置大礮。憑高放射。守備甚密。夏世祖大舉赴援。步兵屯柿野。水兵按據施耐口洋外。時水師不通。性於城中固守待援。相持者久之。又世祖上道典軍劉福祥等連結萬象鎮寧攻擾乂安城。清華以外諸鎮土司各起兵策應。西洋道長亦驅扇本國道徒所在蜂起。光纘勢日窮蹙。遣人以厚幣徵處士阮浹。詢以國事。浹曰不可爲矣。因教纘退守中京。庶幾可緩。纘猶豫不決。辛酉景盛九年。世祖親董舟師直入施耐海口。命阮文張、宋福樑領前道入焚其水屯。黎文悅、武彝巍繼進。勇督諸軍拒戰。礮彈雨集。彝巍落水沒。兵多溺死。文悅督戰乘風縱火盡燒西山船。烟火蔽天。勇僅以身免。耀既失水軍。復增築土壘對射。城中多樹屯柵爲持久計。世祖引兵攻之。累旬不能拔。乃留步將阮文誠等守柿野。與耀相持。而自董舟師直擣富春夏五月初一日入思客海口。駙馬阮文治據龜山。樹木柵以拒。世祖前道攻之弗克。黎文悅、黎質等率戰船數十艘越沙岸入河中海。獲治及潘文策降。其卒五百

人遂進滄海門江口。纘畢衆以拒。世祖乘勝而前。纘兵潰。携寶器北走。委棄清朝封賜勅印。纔出富春橋數里。兵皆四散。遂與其弟太宰光紹、元帥光卿、大司馬賜、都督儔等乘傳望洞海壘。日夜奔馳。端午日渡灤江。至乂安留數日。復乘驛赴清華鎮。飛報其弟光垂以兵來迎。世祖既克富春。遣黎文悅、黎質、宋福、樑入援歸仁。師未至。會城中食盡。留鎮武性協鎮吳從周皆死之。耀勇復據其城。遣大都督張福鳳、司寇定率兵由上道回援富春。鳳糧絕。投定下高堆戰敗。走死蠻中。五月下旬。纘至北城居光垂府第。時連旬積雨。庭中水深尺餘。忽水落地陷深廣各數尺。乂安三層樓亦無故自倒。人皆以爲不祥之兆。是月改九年爲寶興元年。下詔引咎慰撫諸鎮軍民。以侍中學士吳時任爲兵部尙書。協辦大學士阮輝璽爲吏部尙書。侍中御史潘輝益爲禮部尙書。餘封拜有差。築圓丘於黎榔門外。甃方澤于西湖。以冬夏二至分祀天地。親臨國子監攷課學生。優者賞錢。遣阮登礐等如清歲貢。且乞援。時世祖使鄭懷德已航海抵燕京。請封。嘉慶帝納之。而却登礐等回。八月。纘遣弟光垂打點兵馬。先就乂安鎮屯駐。十一月。纘留光紹、光卿等守北城。親督四鎮與清兵三萬自將而南。光耀妻裴氏。春亦率手下五千人以從。節制垂總管超攻鎮寧壘。司隸雪都督阮文堅攻鵝鑾壘。廣平地少尉鄧文勝都督力連結齊、梟匪。船百餘艘。橫列灤江海外。兵勢甚盛。世祖軍退守洞海。十二月晦。纘畢衆渡灤江。世祖親征屯駐洞海。命范文仁、鄧陳常率步兵。阮文張率水兵分道拒之。壬戌。寶興二年正月。光垂兵逼鎮寧壘。世祖兵開壘力戰却之。纘復悉師攻兜鑾壘。蟻附而登。世祖兵以大礮轟擊及擲下巨石。傷斃甚多。纘欲退師。氏春執鞍固請。復麾兵督戰。自日至晡。忽聞水軍爲阮文張所敗。師遂潰。初二日。纘奔東臯。急渡灤江北岸。從者不及十之二。餉船十五艘及軍資器械。

皆爲世祖兵所獲。光垂抵瀘江。又爲世祖兵所阻。不得渡。從山道間行旬餘。始抵乂安。與纘遇。復奔北城。是役也。纘捲地重來。一敗塗地。自是神氣沮喪。惟在城中演射及吟詩而已。耀勇在歸仁聞之。乃率部將徐文昭、阮文縉、阮文甲、阮文點、黎公興等兵丁三千。戰象八千。從上道入哀牢。謀出乂安。時世祖兵已渡瀘江。進攻布政三校屯。拔之。阮文張水軍至丹岸海門。攻破羣木堡。黎文悅、黎質步軍至青龍江。奪麒麟倉。乂安鎮守阮文慎。協鎮阮霑。水軍督領岱少尉。騰棄城奔僂里。令演州府城。霑自縊。慎走清華。世祖兵既克乂安。署置官吏。光耀自歸。合下青山。聞乂安既破。遂過青漳。渡青龍江。從者漸漸散去。耀及妻裴氏春。皆爲世祖兵所獲。文勇亦爲土民捕解。世祖兵至清華。督鎮光盤及慎。膝皆降。十月十六日。光續白度勢不能支。與其弟光垂、光紹及司馬阮文用、阮文賜、都督秀等渡珥河。北走至昌江夜駐。村民謀刦之。光垂自縊。秀及其妻亦自死。纘爲鳳眼民所捕。檻送北城。二十三日。世祖駕幸昇龍城。諸鎮文武官吏皆詣軍前投降。是冬。駕幸富春京告廟。獻俘盡行殺戮。掘岳惠墓。搗棄骸骨。幽其頭于獄室。卽位改元爲嘉隆元年。改西山曰安西邑。明命十二年。續獲岳子文德文良德子文兜各坐腰斬。由是西山族類無有子遺矣。

予述西山史將終。或者語予曰。西山僭僞。歷史上筆削不可不嚴。今子著論。乃平平敘述。又從而帝之。王之律之。是非。豈不大謬耶。丁令威曰。家奴輩之偏袒。於義未常不是。但不足傳爲信史耳。予曰否。否。夫吾人論事。無論何事。不可有所偏袒。况筆之於史。以公之世。一字之褒。一字之貶。苟非堂堂正正。一本至公。何足傳爲信史。今子乃欲予斥黜西山。效家奴輩。下不經之筆法。何其謬耶。

子謂西山爲僭僞。果何所指而言之。夫蜀泮巴蜀人也。趙佗真定人也。彼皆以華人入帝我國。如以國界而論。稱之爲賊爲敵可也。而越史乃大書特書曰安陽王曰趙武帝。黎桓李公蘊乃丁黎之臣子也。黎桓弑丁帝。公蘊奪黎位。而占有天下。如以臣節而論。斥之爲僭爲僞可也。而越史乃大書特書曰黎大行皇帝。曰李太祖皇帝。準之春秋筆法。如此紀載。真所謂謬於是。非而天下竟無有一人著書辨難。以申明國家君臣之大義者。豈非怪事。至如西山阮氏乃我國之歸仁人也。以我國人而帝我國。豈非名正而言順耶。又西山阮氏以草野布衣。與黎氏本無君臣上下之分。則因黎祚式微。代之而奄有天下。亦豈有篡奪之嫌耶。今予據實直書。乃所以取信於天下後世也。且天下者。天下之天下也。惟強有力者。是爲其主人翁。據此義而推。則蜀泮趙佗黎桓李公蘊。皆爲我國當時之主人翁。據實直書之。爲帝爲王。亦無不可。而况西山阮氏也乎。而况阮氏事業。赫奕多有不可泯沒也乎。予請就西山當時事業爲吾子述之。

西山史內主要人物。凡有三人。卽中央皇帝太祖武皇帝東定王是也。東定王早死。事功未就。固無可論。中央皇帝起自寒微。不數載而成帝業。可謂偉矣。然當時帝之爲帝。亦只限於歸仁以南一隅。而未見其有宏大規模也。故予之西山史論。不啻爲太祖武皇帝作專傳也。帝以一匹夫勃興。本無有所憑藉。而事業赫赫。誠非其他帝王可及也。其見於用兵也。臨機應變。料敵如神。叱咤風雷。氣焰萬丈。初攻富春。則唾手而定。再引兵北伐。則所到如夷。又善用尊扶之說。以繫人心。故戰勝攻取。定天下如反諸掌。可謂英雄矣。其見於對外也。外交著著成功。雖今世之大軍學家大政治家。亦不過是。當清國因黎氏之乞援。命兩廣總督孫士毅率兵南來。雖名爲赴援。而其實野心勃勃。有利用其機會而郡縣我國之意。讀者試一閱東華全錄。知彼國當時之處心積念。最爲狡險。使非有帝之才之勇。以擗其鋒。予知我國當時運命。誠有不堪設想。

者而帝一聞清兵之來毫不爲動從容謂將士曰彼兵之來不過自來送死耳先在富春卽皇帝位以繫人心大禮告成卽誓師北征不復返顧果於數十日內盡破清兵士毅狼狽抱頭鼠竄帝引兵長驅直抵鎮南關中國內地人心震動近關之民紛紛扶老携幼避難他往清國政府爲之懾息不敢復萌吞併之野心其命福康安提督九省兵馬南來不過虛張聲勢然其實只專在防禦南兵之北侵免開邊釁耳帝看破內幕遂以文牘往來與福康安講和清廷幸其無事遂命使宣封以結其心帝亦使人代已入覲以示恭順我國當時免清人蹂躪之患帝之賜也然帝之雄心偉略非僅求小安止也又向清廷乞于廣西各地通商並請免抽關稅與今日各國之求通商者無異清帝亦允之繼又向清廷乞求興化六州宣光三峒侵地六州者嵩陵醴泉黃岩綏阜肥謙州三峒者牛羊蝴蝶普園是也其地原屬我國版圖黎末爲清土司侵占累世申辯不能得至是帝移書兩廣請申辦故疆還其侵地廣督以國界已定却其書帝由是深抱不平陰有窺覦兩廣之意繼又上表請婚欲以構釁觀此可見其勃勃欲試之心蓋有所待吾想疆界重定珠還合浦非難事也惜天不祚我國使帝創業未半中道崩殂自是之後無人敢復向清廷索還遂使六州三峒之民永沈浩劫以至今日往事回頭寧不深可嘆耶帝之崩也遺囑卜葬西湖近依天闕以博清帝之好心現代之外交家狡猾手段亦不過是耳其見於內治也定官制攢造丁田簿籍丁分三項田分三等給信牌以防人口之隱陋凡此政策皆具良法美意與今日文明各國之施政無異所可惜者北伐之初卽棄阮有整以自斷其羽翼奄有北城卽殺武文仁以自弱其手足取富春則侵犯阮主歷代陵寢以失人心大業半成卽兄弟交爭以自招其失敗此其失著也予所以述帝之事業未嘗不於此爲英雄三致慨焉繼之者爲景盛帝又以幼冲嗣位權臣擅國以至顛覆惜哉

 文苑

 今詩摘錄

◎過省學堂感作 阮吉

註阮吉廣南寃盤翠羅洲人。中秀才。後得狂易症。每逢人輒唾罵。有不可一世之慨。後卒以窮死。其平生憂時憫世之念。又往往見之於詩。茲得一首錄之於左。

四年前已識荊州。坐我元龍百尺樓。交到忘年傾海量。感深同病痛。天憂宗邦眷念頻。搔首滄海橫襟共。縱眸惆悵稽康廣陵散。知音不遇斷琴休。

◎挽朱黎先生衡

黃意園

名教蕩然思悄然。湖州風景不如前。仰瞻北斗知何處。坐渴春風已十年。道屬晦冥悲孔聖。情於趨步愧顏賢。天心未喪斯文也。吾道還如月上弦。

集芝

曾集芝中華詩人
已於去年謝世

◎前題步修篁孝廉譚君春璣

鹿鳴同宴廿經秋。世路雲萍各異趨。捧檄君娛升斗養。橫琴我縱水山遊。談心家國驚滄海。握手茶樽共白頭。努力保存吾族粹。國文儒教兩綢繆。

北去愁聞鴈一聲。藤江流水寄深情。懷人重展舊吟草。想見巖巖氣未平。蘆洲形勝別鐘英。鹿洞當年負盛名。却怪豐才偏晉遇。妬人造物太無情。

見聞錄（續前）

義園阮文桃抄錄

阮名藥

余邑人阮名藥年十五六。父母以事他往。使藥看家。忽覺目炫耳鳴。心怔忡以驚。俄聞門外嘈雜聲。自遠而近。藥向外窺。見鄉人老稚相提携而走。譁言寇至。又遠聞車馬馳驟殺掠號哭。藥走出。尾鄉人而奔。至野外。回望村內。烟焰燭天。而起藥大恐。竄愈急。稍遠。回顧同走者。並不知所在。子身呆立田壠。方駭愕。忽見三四人。若皂隸狀。反接藥手。牽之行至一處。按其頭使之臥。曰走便殺。藥却驚懼。憊息而臥。頓覺神思昏迷。兩耳鳴嗚。四體如縛。舉動不得。辰聞人行聲。開口欲呼。喉間如有物塞住。不能發聲。許久不食。亦不覺饑。牢臥如死人而已。是日藥父母自外歸。失藥所在。以爲隨頑童遊戲。將覓而撻之。遍鄉無所見。至暮寂然。明日浼親屬四處探覓。亦無知者。至古賈市訪之。旅人一媼曰。客有一人。衣服如所云。狂奔而去。乃迹而行。且行且訪。適遇野人告曰。昨有一人。到此冥目。俛首臥深田泥水中。問之不答。提之不起。不死不活。如癡如聾。豈爾所覓耶。共至其所。扶而起之。果藥也。乃負之回。抵家。尙不能語。投以符藥。久之始開目。又數日方能言。具述所見。神癡者數月。百方醫治。乃愈。

○記三生

寶篆陳尙書典試清化。一舉人能自記前三世事。前生爲人家素豐。頗有前程。多行不義。死後經地獄。見所謂刀山劍樹湯鑊石臼。一如人世所言。閻王按籍罰作鷄。卽令鬼卒押去。鬼卒以氈裸高擲。空際。墜地。閉目。則身在鷄巢中。自顧身爲鷄雛。毛羽尙濕。鷄母抱而翼之。久之。高大駿鷺。家主使之覬覦。勝思欲速死。而主人愛護甚。一日。主人餉以栗。勃起撲主面上。主人猶不忍。又以距踏主人。

兒破腰流血。兒啼而走。猶追琢不已。主人大怒乃殺之。既死復投閻羅殿自訴。閻王以忤主加責。再罰作猪。鬼卒復押去。生不欲行。至一門限。同坐憩息。鬼卒推之仆。自顧已爲小猪。月餘同產者皆賣去。主人獨留已別圈而養。每欲速死。更恐期限未滿。孽障更深。只得忍耐年餘。主人賣於鄉。殺以賽神。魂至冥府。蒲伏自陳。閻王以期限既滿。且能念善。許投胎作人身。卽今生也。

●靈蛇

景興甲申余外祖陳忠諒公爲清化參政。一屬吏負牒勾訟。人行山中。遇一蛇當徑而臥。昂頭吐氣。其大如桶。吏知其神。出牒示之。曰僕奉上司公幹願大王少避路。蛇張目視牒已。復卷臥不避。若不知有吏者。吏粗人。且被酒拔劍叱曰。神耶虫耶。若爲神。不應冥頑若是。若虫喫我。吏欲大步向前。蛇始蜿蜒竄去。且行且目。吏直前去。乘醉放步。更失駐舍。及暮酒醒。尚在萬山中村落。遠無處投宿。遙望山陬有一古廟。逕奔投止。研棕爲席。向神坐再拜。默祈保祐。闔扉而寢。初更聞車馬喧。即見神坐上一人冠袍而下。開門立俟。相見寒暄。畢廟內神問兄將何往來者。曰弟昨日於山遊戲。被承司小吏橫來相干。計他去路當不遠。此弟將得而甘心焉。吏驚慄。自分必死。聞廟內神曰白龍魚服。困於豫且。彼此辰但知蛇耳。且他有公事。何故阻他去路。取侮招犯。兄之過也。更欲從他而禍之。何量之不宏也。兄早歸。如此胡行。天憲可懼。久之聞來神辭謝而返。旣而寂然。吏毛髮竦豎。明早拜謝。疾馬而去。公幹回復賽廟。扮戲致謝。

●昭徵神

京兵名才歲季歸。乂安省鄉出城暮宿平望驛。鷄鳴趨早起行。途次忽一隊車馬從後疾驅而至。肩

輿上一位官長。哲長美鬚髯。神情凜然。問其從騎曰。上人赴京公幹回。卒入夥同行。覺甚快健。辰見溝濠礙道。躍之而過。覺身如在雲霧中。耳邊如聞風車之聲。欲稍退後。兩足如推。不能自主。平明忽失車馬所在。驚愕四顧。已在昭徵大王祠下去家。纔半更許。乃尋歸路。頃刻中計程千餘里。

★海山洞

海陽安廣下路沿海一帶間有山麓島嶼多人跡所不到者。有漁子數人。放舟失風。至一山草木幽邃。拾給而登。步步爽濶。芳草珍菓羅列于徑旁石磚間。信步至山腰。得一深洞。巨石爲障。呼侶攀藤試探。初入甚昏黑。十數步外漸漸明朗。見一石門。兩石獒蹲其外。體樣獰惡。如喫人狀。再入一重。有石几案鑪鼎數坐。又一重。見金人十餘長。大約與人等。布列兩行。杼柚几案器具甚多。純以黃金爲之。光彩奪目。中設一石榻。方長丈許。上臥五屍。皆少婦也。髮從床上披地。各以銅盆承之。衣服皆錦繡。粉黛如新。近之尚有生氣。漁人大怖。招夥而出。貪者或攫金器數事以馳。至門。石獒大吼。山鳴如雷。懷金者兩目如瞽。人牽之亦不能行。大怖。擲金而走。纔出洞門。一巨石如屋。墜塞洞口。聲沸海濤。乃共登舟掛帆疾去。詢之識者。亦不知其何處也。或者先靈殉葬之所歟。

●浮石

戊戌年七月山南道下路。海潮大漲。有浮石無算。隨潮而上。如床如拳。大小不等。辰余家君爲山南。按察上其事。并致石大小各數顆。石質輕鬆。刮之有節。大類漆匠磨鑄石者。不知從何處來。或者海水浮沫。燬日凝結而成歟。